



Uunga siunnersuut: Kommunini suliassaqrifiit aaqqissuuteqqinneqarnerata allangortinneqarneranik Inatsisartut inatsisaat nr. xx, xx,xxx 2016-imeersoq.

(Naalakkersuisut Siulittaasuat)

Inuit Ataqatigiit Inatsisartuni ukiaanerani ataatsimiinnermi nuna tamakkerlugu kommunellu tamakkerlugit kommunit kattunnerisa kingorna suliassanngorsimasunik isummerfigisassanngorsimasunillu ataatsimut isiginnilluta isummersoqqusilluta siunnersuuteqarpugut. Siunnersuut ataatsimiititaliamut ingerlanneqarpoq sulilu aappassaaneerqarani. Siunnersuutitsinni qitiutitarpugut tassaavoq attanneqarsinnaasunik kommunit qanoq katitigaanissaannik tunngavissanik isumaqatigiilluta pilersitsissasugut, kommunit kattunneqarmata tunngaviusut pissutsinut atuuttunut tamatigut naleqquttuusimannginneri paasinarsisimammatt Isumaqaarpugut Inatsisartuni suliassarigippugut nuna tamakkerlugu siunissamilu attanneqarsinnaasumik suliaqassalluta.

Qaasuitsup Kommuneata avinneqarnissaanik Naalakkersuisut siunnersuuteqarpugut. Paasilluarsinnaavarput Naalakkersuisut Qaasuitsup Kommuneani kommunalbestyrelsip aalajangiussaa tusaaniarmassuk, isumaqataavugummi innuttaasut taasitinneqarsimanerat kommunalbestyrelsillu inassuteqarsimanera Inatsisartunit Naalakkersuisuniillu soorunami paasinnilluta iliuseqarfigisariaqarippugut.

Suliali taassuma qanorpiaq naammassineqarnissaa nuna tamakkerlugu naliliivigineqareerpat aatsaat paasineqarsinnaasoq isumaqaarpugut. Maannami takusinnaasarput tassaavoq Qaasuitsup Kommuneani illoqarfiit pineqartut akunnerminni suli isumaqatigiinngittut. Assersuutigalugu Upernavimmi innuttaasut amerlaqisut atsiorsimappugut Ilulissat kommunesani nutaani kommuneqatigiumanagit.

Kommune siunnersuutigineqartut, tamakkiisumillu nuna tamakkerlugu isiginnittumik, tunngavissalu suunissannik ataatsimoorfeqarata, avinneqarpat takorloorneqarluarsinnaavoq ukiualunnguit qaangiuppata nutaamik avitsinissamik kommunalbestyrelsissusussanit inassuteqartoqassasoq.

Allatut oqaatigalugu, Naalakkersuisunit sulieriaaseq maanna ingerlanneqartoq attanneqassappat naalakkersuinikkut aqunneqarsinnaasumik nunatsinnullu ataatsimut isiginnilluta iliuusissanik pitsaanerpaanik nassaarniarnissaq ajornakusuuksaaq.

Inuit Ataqatigiit taamaammatt inassutigarpugut kommunit tamakkerlugit naliligassat tunngavissanillu isumaqatigiilluta suliaqaqqaarluta kommunit ataasiakkaat avinneqassappata taama ilinissamut suliassartai nanginneqassasut.

INUIT ATAQATIGIIT

INATSISARTUNI



Qaasuitsup Kommuneani innuttaasut taasiartorsimasut nipaap tusaalluarpavut. Isumaqaataavugut Qaasuitsup Kommunea maannamit allaanerusumik aaqqissuunneqartariaqartoq. Siunissamulli attanneqarsinnaasumik, allanngoraqattaartussaannngitsumik, aalajangiinissatsinnut tunngavissaqarluartariaqarpugut tamatumunngalu sulii anngutinngilluinnarpugut.

Kommuneni naalackersuinikkullu nukivut qanoq atussanerlutigit eqqarsaatigilluartaqarparput. Ukunimi kingullerni Qaasuitsup Kommuneani avinneqarnissamut politikikkut nukippasuit atorineqarsimapput ukiunilu tulliuuttuni avitseqqinnissamut nukiit atorineqaleqqissanngippata attanneqarsinnaasumik inissiisoqartariaqarpoq.

Pineqartummi tassaapput innuttaasut. Innuttaasut sullinneqarneri, innuttaasut kiffartuunneqarneri innuttaasullu kommuneminni ataatsimoorfissaqartutut misigisimanissaat.

Pineqartoq aamma tassaavoq kommunemi aqutsilluarnissaq, isumaginninnikkut suliaassanik, atuarfeqarnikkut suliaassanik, utoqqartatsinnik meerartatsinnillu isumassuinikkut suliaassanik, inuussutissarsiornikkullu siuarsagassanik suliaqarnissatsinnut nukissaqarluarnissarput.

Pineqartorlu aamma tassaavoq innuttaasunut qaninnerusumik aqutsinissaq anguniarlugu kommunet tamarmik oqartussaaffinnut namminersornerulernissaat, tamannalu anguneqassappat kommunet ingerlalluurtut kommunellu nukittuut innuttaqortussutsimikkut kivitsilluarsinnaasut atorfissaqartippavut.

Tunngavissat sammilluaqqaartigit, ataatsimoorluta attanneqarsinnaasumik aaqqiissutissamik nassaarniarta, nukivut kattullutigit akisussaassusilimmik ingerlatsisa.

Inuit Ataqatigiit inatsisissatut siunnersuut taama isikkoqartillugu akueriinnarsinnaanngilarput. Innuttaasut salliutillutigit nunarpullu ataatsimut isigalugu suliaqaqqaarnissaq inassutigaarput taamaammallu siunnersuut ataatsimiititaliamut susassaqartumut ingerlateqqipparput ataatsimiititaliami aaqqiinermik siunissami attanneqarsinnaasumik, Qaasuitsullu Kommuneani innuttaasunit akuersaarneqarluarsinnaasumik, inerniliussassamik nassaarsinnaanissamut suliaqarnissamut periarfissiuumalluta.

Qujanaq